



Aqqalu C. Jerimiassen
Atassut

UKA 2025/65
11. november 2025

Inuusuttut suliffissaaleqisut ikilisarnissaanut suliniarnerup annertusarnerani qanoq ililluta politikkikkut suliffeqarfiit innuttaasunik tapersersortarialinnik suliffissaqartitsisut siuarsarsinnaanerigut apeqquteqaat aallavigalugu oqallinnissamik siunnersuut

(Inatsisartunut ilaasortaq Margrethe Th rup Andersen, Demokraatit)

Margrethe Th rup Andersenip Demokraatineersup apeqquteqaat aallaavigalungu oqallisissamik pingaarutilimmik qaqitaqarneranut Atassummiit qujavugut.

Nunarput ingerlalluassappat siunissamut assaat sulisinnaasut tamaasa pisariaqartippavut, ukiuni makkunani ilisimanngilarput Nunarput tamaat inuusuttut qanoq amerlatigisut sulinnginnersut, matumani erseqqissaatigissavara suliffissaaleqisutut nalunaarsorneqarsimasut pinnginnakkit.

Assersuutigerusuppara Avannaata kommuniata misissuititsisimanera¹ aallaavigalugu nittartakkatigut Sermitsiakkut saqqummiunneqartoq 2024-mi inuusuttut 234-it 15-iniit 29-it tungaanut ukioqartut meeqqat atuarfianniit naammassinninnerup kingorna ilisimaneqanngitsut sumiinnarsut aammalu sulerinersut. Uteqqippara: ilisimaneqanngitsut sumiinnarsut aammalu sulerinersut,

Matumani Avannaata kommunia kisimi nalunaarsuisimavoq misissuititsisimangallarnerni, Atassummiit kaammattuutigerusupparput Naalakkersuisunut Nunarput tamaat misissuititsisoqarsinnaaneranut suliniuteqartoqarnissaanut isumaliuteqartoqaqqullugu, suliffissaaleqisutut nalunaarsorneqarsimasut saniatigut inuusuttut assersuutitut 15-iniit 29-t tikillugit ukiullit sulerinersut ilisimaneqanngitsut kisitsisaatigineqarnissaat paasissutissanillu pissarsiffigineqarnissaat siunertaralugu.

Paasissutissat nalunaarusiat tamakkua pisinnaasuugutsigit siunissami aajagiisinnaassutsitsinnut assiliaq tamakkiinerusoq isigalungu politikkikkut suliniarnerput ingerlassinnaanerussagatsigu siunissamut, matumanilu aamma apeqquteqaat aallaavigalugu oqallinnissamik siunnersuuteqartup suliffeqarfiit innuttaasunik tapersersortarialinnik suliffissaqartitsisut siuarsassallugit arlaatigut naleqqussaasoqassappat assersuutigalungu sulinerup kajumernarnerulertinnissaanut sakkussat periusissiat siammasinnerusut taputartuunneqarsinnaaniassammata ilanngullugit.

Oqallinnissamik siunnersuut una inuusuttunut suliffissaaleqisunut tunngasoq Atassummiit ilalerlugu inuusuttunik sulerinersunik sumiinnarsullu ilisimaneqanngitsunik siunnersuut ilaqartikkusupparput tapullugu. Siunnersuuteqartup oqallinnissamut siunnersuutaa siunissatsinnut pingaaruteqaqisoq

¹ <https://www.sermitsiaq.ag/samfund/budget-for-2024-klar-i-avannaata-kommunia/374971>



sapinngisamik inuusuttunik katataqanngitsumik suliffeqarfinnik innuttaasunik tapersersortarialinnik suliffissaqartitsisut neqeroorsinnaaqqullugit.

Atassummiit siunnersuuteqartoq oqallinnissamik paasilluarparput, 28 november 2019²-meersoq inatsit atuutilereersimangaluartoq ataasiakkaat suliffeqarfiit eqqaassanngikkaanni Nunatta kujataani kangianilu ingerlataqartut aammalu Nuummi Nunatta sinnerani inatsit toqqammavigalugu ingerlatsisunik allanik suliffeqarfinnik tusarsaasoqanngilaq.

Tamannalu sooq taamaannersoq aamma qulaajarsimanagu nalilersoruminaappoq, inuusuttattalu suliffissaaleqinerat akiorniarlugu inuiaqatigiinni inatsisiliorsimagutta ullumikkumullu ukiuni tallimani ingerlareersumi inatsisip atuutilersimaneraniit siammasissumik iluatsissimanngippat nalilersueqqittariaqarpugut sooq taamaattoqarnersoq.

Siunissami unammillingassagut taama amerlatigitillugit inuiaqatigiinni akissaqanngilagut inuusuttatta suliffeqarfinnut appakaatsinnginnissaanut, innuttaasut ukiuni tulliuttuni utoqqalisussat amerliartortussaattillugit sulisinnaasullu ikiliartuinnartussaattillugit kikkut tamaasa sulisinnaasut maannagaaq pisariaqartippagut.

Taamaattumik Atassummiit oqallinnissamut siunnersuuteqartup oqariatuutaa paasilluarlugu Naalakkersuisut kaammattorpagut inuusuttatta ilisimaneqanngitsut akornanni misissuisinnaanerit isumaliuutigeqqullugit aammalu *Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat* saniatigut suliniuteqartoqassanersoq nalilersoqqullugu politikkikkut, imaluunniit pisortat inatsit pillugu inuiaqatigiinnut qaammarsaasariaqarnersut nalilersoqqullugu.

Takussutissaareerpoq ukiuni tallimani inatsit atuutilersimangaluartoq Nunarput tamaat isigalungu suliffeqarfinnik innuttaasunik tapersersortarialinnik ingerlatsisunik amigaateqartugut. Matumanimi aamma assersuutissaqqippoq ilanngullugu inoqarfinni minnerni qanoq ingerlataqartoqarsinnaanera isumaliuutersuutigineqarsinnaasoq.

Atassummiit oqallinnissamut siunnersuuteqartumut qujaqqilluta taama oqaaseqaateqarpugut.

2 Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat